


# La muscatère

227

Coum ue grâne ma qui pourtaré cent dits,  
La muscatère à la muralhe que s'arrape  
E, cade die, à pous de tayts berds, que garrape  
Quilhade fieramén dessus sas arredits,

Qu'oumbreye la frinèste e que bayle la porte.  
A la prime, aquets dits noudats e bourroulhuts  
Que tiren, estuyats debat lous brouts hoelhuts...  
Que la cau estanga, la bite que l'emporte.



— En Setème, qu'atrasse u schàmi d'aymadous  
— Qui-u biémen, à d'arroun, dansa la farandole,  
— Que dirén u baran de sourelh qui l'ardole. —  
E qu'ous dèche, tan qui-us hè gay, préne poutous.

E lous boussalous d'or e de belours que chuquen  
A poupats loungs, gouluts, lous arrasims briulets,  
Puch, briacs, que s'en ban à pous, à biroulets,  
Auta pla, sus lous gras madus à punt que-s truquen.

Coum ère lou Payri qui la planta, que sèy  
Goarda ta pla qui-s pot la berde muscatère,  
E lou bielh qui repause adare debat terre  
Que-s pot dîse : « Que-n y a qui-s broumben que passèy ».

Tabé, quoaan pùyi per las brangues qui s'agnoquen  
Ta coèlhe l'arrasim oun lou sou bién mouri,  
Que-m sèmbre de trouba lous bras dou me payri  
E que soun pots encoère encalourits que-m toquen.